



食貨典第一百六卷

荒政部紀事三

宋史蒲宗孟傳宗孟爲提舉帳司官察訪荆湖兩路呂惠卿制手實法然猶許災傷五分以上不預宗孟言民以手實上其家之物產而官爲注籍以正百年無用不明之版圖而均齊其力役天下良法也然災傷五分不預焉臣以爲使民自供初無所擾何待豐歲願詔有司勿以豐凶弛張其法從之民於是益病矣

王覲傳覲爲潤州推官二浙旱郡遣吏視苗傷承監司風旨不敢多除稅覲受檄覆按歎曰旱勢如是民食已絕倒廩贍之猶懼不克濟尙可責以賦耶行數日盡除之監司怒搢搯百出會朝廷遣使振貸覲請見爲言民間利病使者喜歸薦之除司農寺主簿

東軒筆錄劉彝所至多善政其知處州也會江西饑歉民多棄子於道上彝揭榜通衢召人收養日給廣惠倉米二升每月一次抱至官中看視又推行於縣鎮細民利二升之給皆爲子養故一境闕子無天闕者

宋史張景憲傳景憲知瀛州上言比歲多不登民積逋欠今方小稔而官督使併償道路流言其禍乃甚於凶歲願以寬假帝從之

朱服傳服知潤州徙泉婺寧廬壽五州廬人饑守便宜振護全活十餘萬口明年大疫又課醫持善藥分拯之賴以安者甚衆

杜純傳純弟紘起進士爲永年令歲荒民將他往召諭父老曰令不能使汝必無行若留能使汝無饑皆喜聽命乃官給印券使稱貸於大家約歲豐爲督償於是咸得食無徙者明年稔償不愆素神宗聞其材用爲大理評斷官

李中師傳中師擢度支判官爲淮南轉運使兩浙饑移淮粟振贍僚屬議勿與中師曰朝廷視民淮浙等爾卒與之

沈遵傳遵從弟括爲太子中允加史館檢討淮南饑遣括察訪發常平錢粟疏溝瀆治廢田以救水患

循吏傳程師孟知南康軍楚州提點鹽路刑獄部無常平粟建請置倉適凶歲振民不足卽矯他儲

儲不俟報吏懼白不可師孟曰必俟報饑者盡死矣竟發之

盧革傳革子秉提點兩浙淮東刑獄進制置發運副使東南饑詔捐上供米價以糴秉言價雖賤貧者終艱得錢請但償糴本而以其餘振贍是歲上計神宗問曰聞滁和民捕蝗充食有諸對曰有之民饑甚殍死相枕籍帝惻然曰前此獨趙抃爲朕言之耳

滕元發傳元發知鄆州時淮南京東饑元發慮流民且至將蒸爲癘疫先度城外廢營地召諭富室使出力爲席屋一夕成二千五百間并竈器用皆具民至如歸所全活五萬

李周傳周登進士第調長安尉歲饑官爲粥以食餓者民至集不可禁縣以屬周周設桮棬間老少男女無一亂者

和斌傳斌擢文思副使權廣西鈐轄累歲徙涇原渭部饑帥王廣淵命吏賑給斌曰救之無術是殺之耳廣淵以委斌斌擇地營居養視有法所活以萬數

外戚傳向傳範從姪經知河陽會旱蝗民乏食經度官廩歲用無餘乃先以圭田租入振救之富人爭出粟多所濟活

續文獻通考范堯夫知慶州饑孳滿路官廩盡空公議發常平封椿粟麥濟之州邑欲俟奏請後發公曰人七日不食死可待報乎吾寧獨坐罪不累若等遂發粟

宋史孫永傳永知瀛州河決於貝瀛冀尤甚民租以災免者州縣懼常平法徵催如故永連章論止神宗從之仍命發廩粟以振

孫覺傳覺登進士第調合肥主簿歲旱州課民捕蝗輸之官覺言民方艱食若以米易之必盡力是爲除害而享利也守悅推其說下之他縣

王化基傳化基孫詔知博州元祐初朝廷起回河之議未決而開河之役遽興詔言河朔秋潦水淫爲蓄民人流徙賴發廩振贍思稍蘇其生謂宜安之未可以力役傷也從之

荒政考略呂公著爲相元祐三年頻雪民苦寒多有凍死者公著日與同列議所以救禦之術乃發官米炭遣官數十分置場於京師賤鬻以惠貧民又出內庫錢十萬緡委開封府官吏遍走閭閻周視而賑之又遣官按視四福田院存撫丐者給以日廩須春暮而止農民貸種糧流移在道者所過州縣存恤寓以官舍續其食流配罪人隨所在寄禁亦委官吏安存之或爲饘粥湯藥以救疾或爲

芟屋紙衣以禦寒民有棄老稚於路者皆設法收養之

宋史蘇軾傳軾知杭州大旱饑疫並作軾請於朝免本路上供米三之一復得賜度僧牒易米以救饑者明年春有減價糶常平米多作饘粥藥劑遣使挾醫分坊治病活者甚衆軾曰杭水陸之會疫死比他處常多乃哀羨緡得二千復發橐中黃金五十兩以作病坊稍畜錢糧待之

梁燾傳燾知潞州值歲饑不待命發常平粟振民流人聞之來者不絕燾處之有條人不告病

王巖叟傳巖叟爲侍御史諸路水災朝廷行振貸戶部限以災傷過七分民戶降四等始許之巖叟言中戶以上蓋亦艱食乞毋問分數等級皆得貸庶幾王澤無間以召至和矣

避暑錄話叔祖度支諱溫叟與子瞻同年議論每不相下元祐末子瞻守杭州公爲轉運使浙西適大水災傷子瞻銳於賑濟而告之者或施予不能無濫且以杭人樂其政陰欲厚之公每持之不下卽親行部一皆閱實更爲條畫上聞朝廷主公議會出度牒數百付轉運司易米給民杭州遂欲取其半公曰使者與郡守職不同公有志天下何用私其州而使我不得行其職卒視它州災傷重輕分與之子瞻怒甚上章詆公甚力廷議不以爲直乃召公還爲主客郎中子瞻之志固美雖傷於濫

不害爲仁而公之守不苟其官亦人所難見前輩居官無不欲自行其志也

江西通志鄭民瞻紹聖三年以朝請大夫爲袁州刺史連歲不登乃量地里夫家衆寡豪民積穀幾何均數約直給告糴者閭四境爲一圖張之便坐而間遣使按視民免流亡之憂

宋史張康國傳康國第進士知雍丘縣紹聖中戶部尙書蔡京整治役法薦以參詳利害使提舉兩浙常平推行之豪猾望風斂服發倉救荒江南就食者活數萬口

忠義傳鄭驤知溧陽縣歲饑民多逃亡漕司按籍督逋賦不少貸驤患之盡去其籍使者欲繩以法驤曰著令約二稅爲定數今不除則逋愈多民愈貧賦愈不辦使者不能屈

朱景傳景子光庭爲左司諫河北饑遣持節行視卽發廩振民而議者以耗先帝積年兵食之蓄改左司員外郎後守潞州鄰境旱饑流民入境者踵接光庭日爲食以食之常至暮自不暇食遂感疾猶自力視事出禱雨拜不能興再宿而卒

畢士安傳士安子仲游知耀州歲大旱仲游先民之未饑揭喻境內曰郡振施與平糴若干萬碩實虛張其數富室知有備亦相勸發廩凡民就食者十七萬九千口無一人去其鄉

范鎮傳鎮從孫祖禹拜右諫議大夫遷給事中吳中大水詔出米百萬斛繒錢二十萬振救諫官謂
訴災者爲妄乞加驗考祖禹封還其章云國家根本仰給東南今一方赤子呼天赴愬開口仰哺以
脫朝夕之急奏災雖小過實正當略而不問若稍施懲譴恐後無復敢言者矣

鄭雍傳雍爲起居郎進中書舍人吳中大饑方議振恤以民習欺誕敕本部料檢家至戶到雍言此
令一布吏專料民而不救災民皆死於饑今富有四海奈何謹圭撮之濫而輕比屋之死乎哲宗悟
追止之

荒政考略晁補之知齊州歲饑河北流民道齊境不絕補之請粟於朝得萬斛乃爲流者治舍次具
器用人既集則又旦日給糜粥藥物補之皆躬臨治之凡活數千人擇高原以葬死者男女異墟使
者頗媚其功欲有以撓之既至境按事乃更歎服

江西通志蘇緘爲南城令歲凶里中藏粟者固閉以待價緘籍得其數先發常平穀以定中價糴於
民揭榜於道曰某家有粟幾何令民用價糴有勸不出及出不如數者撻於市以是民無艱食

宋史洪皓傳皓宣和中爲秀州司錄大水民多失業皓白郡守以拯荒自任發廩損直以糴民至集

皓恐其紛競乃別以青白幟涅其手以識之令嚴而惠徧浙東綱米過城下皓白守邀留之守不可皓曰願以一身易十萬人命之感之切骨號洪佛子其後秀軍叛縱掠郡民無一得脫惟過皓門曰此洪佛子家也不敢犯

避暑錄話余在許昌歲適大水災傷京西尤甚流殍自鄧唐入吾境不可勝計余發買常平所儲奏乞越常制賑之幾十餘萬人稍能全活惟遺棄小兒無由皆得之一日詢左右曰人之無子者何不收以自畜乎曰人固願得之但患既長或來歲稔父母來識認爾余爲闕法則凡因災傷棄遺小兒父母不得復取乃知爲此法者亦仁人也夫彼既棄而不育則父母之恩已絕若人不收之其誰與活乎遂作空券數千具載本法卽給內外廂界保伍凡得兒者使自言所從來明書於券付之略爲籍記使以時上其數給多者賞且常平分餘粟貧者量授以爲資事定按籍給券凡三千八百人皆奪之溝壑置之襁褓此雖細事不足道然每以告臨民者恐緩急不知有此法或不能出此術也

宋史薛弼傳弼爲湖南運判時道殣相望弼以聞帝恻然命給錢六萬緡廣西常平米六萬斛鄂州米二十萬斛振之且使講求富弼青州荒政民賴以甦

江西通志夏穎達知吉州龍泉縣歲大饑郡守希轉運使意不聽民訴災民遮穎達馬號泣以請詣府陳之不許因趨出悉取民所訴狀屬吏按行阡陌尤捐其租自詣轉運使得捐恤屬邑效之

浙江通志劉愚爲安鄉縣令會歲歉出常平米振貸邑佐持不可愚曰有罪不以相累出緡錢數千萬召商糴他郡而收元直米價頓平

宋史薛徽言傳徽言爲樞密院計議官紹興二年遣使分行諸路徽言在選中以權監察御史宣諭湖南時郴道桂陽旱饑徽言請於朝不待報卽諭漕臣發衡永米以振而以經制銀市米償之所刺舉二十人使還他使皆進擢宰相呂頤浩以徽言擅易守臣而移用經制銀出知興國軍

湖廣通志呂頤浩知潭州歲旱浩究心荒政奏撥上供米三萬令廣西帥漕兩司備五萬石充賑乞降助教敕度僧牒誘上戶糴米全活者衆

宋史章誼傳誼知温州適歲大旱米斗千錢誼用劉晏招商之法置場增直以糴米商輻輳其價自平部使者以狀聞詔遷官一等

葉衡傳衡知臨安府於潛縣歲災蝗不入境治爲諸邑最擢知常州時水潦爲災衡發倉爲糜以食

古今圖書集成
饑者或言常平不可輕發衡曰儲蓄正備緩急可視民饑而不救耶疫大作衡單騎命醫藥自隨徧問疾苦活者甚衆

宗室傳不怠爲成都路轉運判官適歲饑不怠行抵瀘南貸官錢五萬緡遣吏分糴比至下令曰米至矣富民爭發粟米價遂平雙流朱氏獨閉糴邑民羣聚發其廩不怠抵朱氏法籍其米黥盜米者民遂定永康軍歲治都江堰籠石蛇絕江遏水以灌數郡田吏盜金減役夫堰不固而埧田失水故歲屢饑不怠躬視操板築繩吏以法乃出令民業耕者田主貸之事末作者富民振之老幼疾患者官爲粥視全活數百萬 善俊知廬州會歲旱江浙饑民麋至善俊括境內官田均給之貸牛種僦屋以居死者爲給槥人至如歸再知建州歲饑民羣趨富家發其廩監司議調兵掩捕善俊曰是趨亂也諭許自新平米價民乃定

洪皓傳皓子遵試吏部侍郎平江湖秀三州水無以輸秋苗有司抑令輸麥遵言麥價殊不在米下民困如是奈何指夏以爲秋衍一以爲二使擠溝壑乎願量取其半而被水害者悉免之

尤袤傳袤除淮東提舉常平改江東江東旱單車行部覈一路常平米通融有無以之振貸朱熹知

南康講荒政下五等戶租五斗以下悉蠲之表推行於諸郡民無流殍上召對言水旱之備惟常平義倉願預飭有司隨市價禁科抑則人自樂輸必易集事除吏部郎官遷樞密院正兼左諭德夏旱詔求闕失表上封事大略言救荒之策莫急於勸分輸納既多朝廷吝於推賞乞詔有司檢舉行之顏師魯傳師魯知莆田福清縣歲大侵發廩勸分有方而不遏糴價船粟畢湊市糴更平

續文獻通考曾用虎知興化軍事立平糴倉捐楮幣萬六千緡爲糴本益以廢寺之穀歲歉價高則發倉以糴之歲豐價平則散諸寺易新穀爲藏焉

八閩通志黃公度紹興間簽書平海軍判官有流民數百自汀虔下守將疑其變盡繫之行旅騷然公度力爭以爲此皆平人饑餓流徙出於下計奈何又急之使聚而爲盜如其言縱去數百人得全性命而軍亦賴以安

宋史儒林傳劉清之登進士第調萬安縣丞時江右大侵郡檄視旱徒步阡陌親與民接凡所蠲除具得其實州議減常平米直清之曰此惠不過三十里內耳外鄉遠民勢豈能來老幼疾患之人必有餒死者今有粟之家閉不肯糴實窺伺攘奪者衆也在我有政則大家得錢細民得米兩適其便

乃請均境內之地爲八俾有粟者分振其鄉官爲主之規畫防閑民甚賴之帥龔茂良以救荒實跡聞於朝

汪應辰傳應辰爲四川制置使蜀大旱詔問救荒之策應辰奏利閬綿梓軍馬糧料隨民力均敷官雖支糴錢民不得半價若選官就歲熟處糴之可以寬民力第無錢束手乞給度牒上曰汪應辰治蜀甚有聲且留意民事如此給度牒四百永爲糴本振濟遂移書諸路漕臣亟救荒且以縣劍和糴告之而全蜀蒙惠

荒政考略趙令詔隆興二年帥紹興是時流民聚城郭待賑濟餓而死者不可勝計通判王恬閬丘寧孫建策云今盡常平義倉之米賑給之至來年麥熟止恐無以爲繼況旬給斗升之米官不勝其勞民不勝其病莫若計其地里之遠近口數之多寡人給兩月之糧令歸治本業不猶愈於聚集城郭待斗升之給困餓而死乎趙行其言委官抄劄給糧以遣之

浙江通志唐閬山陰人舉進士兩浙歲饑詔以閬爲浙東檢察使時州縣賑濟勸民減價而糴豪右往往閉糴閬奏儲粟之家宜勿限以價勿計以數則趨利之徒將傾囷競售不待低昂而價自平民

饑不相保小兒遺棄衢路國法三歲以下許異姪收育閭閻請雖及十歲權聽民鞠養以爲己子孝宗可之於是全活甚衆 劉銓隆興中知海鹽大水害稼被檄檢傷放秋苗數萬斛貧不能輸者請於朝得停閣勸富人發廩賑饑民無畊資貸於郡給之

宋史龔茂良傳茂良除江西運判兼知隆興府上以江西連歲大旱知茂良精忠以一路荒政付之茂良戒郡縣免積稅上戶止索逋發廩振贍以右文殿修撰再任疫癘大作命醫治療全活數百萬進待制敷文閣賞其救荒之功除禮部侍郎明日卽拜參知政事淮南旱茂良奏取封樁米十四萬委漕帥振濟或謂救荒常平事今遽取封樁米毋乃不可茂良以爲淮南只尺敵境民久未復業饑寒所逼萬一嘯聚患害立見寧能計此米乎他日上獎諭曰淮南旱荒民無饑色卿之力也

荒政考略漢州長者李發遇歲不登輒爲食以食饑者自春徂冬日以千數乾道戊子民饑甚官爲發廩勸分而就食李家者日至三四萬人明年流民未復而荒政已罷民愈困弊數百里間扶老攜幼挈釜束薪而以李爲歸者其衆又倍於前自紹興之丙辰至此三十餘年歲以爲常所出捐不知其若干斛所全活不知其幾千人州郡及諸使者始上其事孝宗嘉之授初品官

宋史洪皓傳皓子遵乾道六年起知信州徙知太平州運使張松治溧水永豐圩來調丁米木數甚廣遵曰郡當歲儉方振恤流移勸分乞糴如自刳其股以充喉不暇食況能飽他人腹哉執不從楚地旱旁縣振贍者慮不早施置失後先或得米而亡以炊或闔戶孳藉而廩不至遵簡賓佐隨遠近壯老以差賦給蠲租至十九又告糴於江西得活者不啻萬計戍兵乘時盜利曹伍剽於野盡執拘以歸其軍故當大札瘥而邑落晏然

皓子遵乾道六年知贛州辛卯歲饑贛適中熟邁移粟濟

鄰郡僚屬有諫止者邁笑曰秦越瘠肥臣子義耶

李燾傳燾除湖北轉運副使總餉呂游問入奏燾攝其事歲饑發鄂州大軍倉振之僚屬爭執不可燾曰吾自任不以累諸君尋如數償之游問返果劾燾專上止令具析不之罪也

八閩通志潘時乾道中知興化軍事適歲荐饑募客舟與錢博糴而寬其限人始莫諭其意既而糴者得以其間往還一再然後及期則糴價久已自平矣人服其有謀

宋史孝繫傳繫第進士爲隆州判官攝綿州歲侵出義倉穀賤糴之而以錢貸下戶又聽民以茅秸易米作粥及楮衣親衣食之活十萬人明年又饑叩蜀彭漢成都盜賊蠭起綿獨按堵知永康軍移

利州提點成都路刑獄兼提舉常平歲凶先事發廩蠲租所活百七十萬人知興元府安撫利州東路漢中久饑劍外和糴在州者獨多糴嘗匹馬行阡陌間訪求民瘼有老嫗進曰民所以饑者和糴病之也泣數行下糴感其言奏免之民大悅

劉琪傳琪知潭州湖南安撫使淳熙二年移知建康府江東安撫使行宮留守會水且旱首奏蠲夏稅錢六十萬緡秋苗米十六萬六千斛禁止上流稅米遏糴得商人米三百萬斛貸諸司錢合三萬遣官糴米上江得十四萬九千斛籍主客戶高下給米有差又運米村落置場平價振糴貸者不敢償起是年九月盡明年四月闔境數十萬人無一人捐瘠流徙者

蕭燧傳燧知嚴州移知婺州婺與嚴鄰歲旱浙西常平司請移粟於嚴燧謂東西異路不當與然安忍於舊治坐視爲請諸朝發太倉米振之召還言江浙再歲水旱願下詔求言仍令諸司通融郡縣財賦毋得督迫

道學傳朱熹提舉江西常平茶鹽公事會浙東大饑宰相王涯奏改熹提舉浙東常平茶鹽公事卽日單車就道熹始拜命卽移書他郡募米商蠲其征及至則客舟之米已輻輳熹日鉤訪民隱按行

境內單車屏徒從所至人不及知郡縣官吏憚其風采至自引去所部肅然凡丁錢和買役法權酷之政有不便於民者悉釐而革之於救荒之餘隨事處畫必爲經久之計

謝諤傳諤爲吉州錄事參軍歲大侵饑民萬餘求廩官吏罔措諤植五色旗分部給糶頃刻而定李椿傳椿爲廣西提點刑獄移湖北漕適歲大侵官強民振糶且下其價米不至益艱食椿損所強糶數而不遏其直未幾米舟湊集價減十三知潭州湖南安撫使歲旱發廩勸分蠲租十一萬糶常平米二萬活數萬人

黃黼傳黼除兩浙路轉運判官浙東頻海之田以旱澇告常平儲蓄不足黼捐漕計貸之毗陵饑民取糠粃雜草根以充食郡縣不以聞黼取民食以進乞捐僧牒緡錢振濟所全活甚衆

謝深甫傳深甫爲大理丞江東大旱擢爲提舉常平講行救荒條目所全活一百六十餘萬人

辛棄疾傳棄疾知隆興府兼江西安撫時江右大饑詔任責荒政始至榜通衢曰閉糶者配疆糶者斬次令盡出公家官錢銀器召官吏儒生商賈市民各舉有幹實者量借錢物逮其責領運糶不取子錢期終月至城下發糶於是連櫓而至其直自減民賴以濟時信守謝源明乞米掇助幕屬不從